

Ptače stawiznički – baćon

Baćon trjeba wšědnje znajmjeńša 500 gramow picy. Rady by žaby žrať, tola přez moderne ratarstwo su so zhubili wložne łuki, na kotrychž su žaby žiwe. Ratarjam běchu hrjebički a mokre blaki wosrjedź łukow na puću. Tuž łóji baćon nimale wšitko, štož móže ze swojim dołhim pyskom dosahnyć.

Što pak, jeli w hnězdze baćonowa žona z dwěmaj młodymaj sedži? Kelko picy trjeba tuta swójba wšědnje? 4 baćony – 4 króc 500 gramow – to je 2000 gramow – dwaj kilogramaj. Ale tute jednore ličenje cyle njetrjechi. Tajki nimale dorosceny młody baćon, kiž bórze z hnězda wuleći, trjeba mjenujcy wjace picy hač nan a mać, a to wšědnje pođra kilograma. Potajkim trjeba tuta baćonjaca swójba na dzeń 4 kilogramy picy. Tute mnóstwo dyrbitej staršej wšědnje nałójić.

A nětko je jasne, čehodla su za naše baćony wložne łuki tak wažne – a wy wěsće tež, čehodla klepotaki w žnjenskim času za syčomłóćawami chodža. Tam móža najspěšnišo wjele myšow popadnyć!